

國朝耆獻類徵初編卷之七目錄

宰輔七

李天馥

陳廷敬

熊賜履

國朝耆獻類徵初編卷之七

通奉大夫前署江西巡撫江西布政使司布政使湘陰李桓輯

宰輔七

李天馥

李天馥河南永城人順治十五年進士改庶吉士十八年散館授檢討康熙七年丁父憂十年服闋補原官十一年充順天武鄉試副考官尋遷國子監司業晉翰林院侍講十四年遷侍講學士十五年正月轉侍讀學士十月充日講起居注官十二月遷詹事府少詹事十六年擢內閣學士十八年正月充經筵講官九月充武會試正考官十九年四月雨澤愆期特旨偕大學士明珠等會

同三法司詳鞫已結重案減等發落二十年擢戶部左侍郎二十一年充會試副考官二十三年轉吏部二十四年充政治典訓副總裁二十七年擢工部尙書三月 上召總河靳輔巡撫于成龍面詢河工事宜輔以高家堰外築重隄截水盡出清口不令歸下河淮揚七州縣被災之田可出若開濬下河恐有海水倒注之患成龍以修下河開海口遵 特旨行今高家堰修築重隄停開海口縱上流水不至而秋霖暴漲天長六合等處水無所洩海口仍應開二人各堅執一說 上命會同九卿詳議天馥尋議下河海口當開高家堰重隄宜停 上從之五月調刑部十二月調兵部二十九年吏部行取知縣以科道用 命大臣各舉所知天馥舉

三河縣知縣彭鵬靈壽縣知縣陸隴其居官有聲 諭曰陸隴其
彭鵬服官廉介朕所素知准行取三十年轉吏部三十一年授武
英殿大學士三十二年丁母憂回籍三十四年以原官入閣辦事
三十六年充平定朔漠方略總裁三十八年七月疾 上遣內閣
學士特默德及太醫官三員存問賜尙方藥物十月卒遺疏入得
旨李天馥簡任機務效力有年勤慎素著忽聞溘逝朕心深爲
軫惻著遣散秩大臣一員侍衛十員往奠茶酒應得卹典察例具
奏尋 賜祭葬如例諡文定子孚青康熙十八年進士官編修

右 國史館本傳

康熙三十八年十月大學士合肥李公薨於位遺疏聞 上震悼

命大臣侍衛至邸第奠茶酒禮臣舉卹典閣臣議諡法翰林院
撰代言之文以祭且疏其生平立朝行己之大者著之碑先是
公寢疾上自塞外聞之曰何不早奏卽遣學士問所苦賜禁
方上藥諭御醫用心調理視朝畢輒問病勢減以否蓋上臨御
久嘗屢易執政諸大臣深惟政本之地爲治化樞恆難其人試公
者歷有年所益信其可大任而公入閣未期月卽以憂去上特
虛席以遲其來公益愼乃位屬海內又安持大體不求赫赫名惟
清靜和平與師師百僚化紛更異同之迹歸於無事以仰稱聖
天子休息愛養元元含宏廣大之至意中外食隱然之福無窮在
位五年善始善終而羣情猶以年之不長不獲究其施爲惜云公

之喪將行孤子編修孚青以狀泣請於其長門下士韓莢爲辭以
納諸墓謹敘以銘敘曰公諱天馥字湘北號容齋先世湖廣黃岡
人遷於廬者爲始祖諱英洪武初以軍功授世襲廬州衛指揮僉
事因家焉七傳至公會祖諱應元祖諱長庚父諱萬化皆以公貴
誥贈光祿大夫武英殿大學士兼吏部尙書累世雖高勳世胄
皆好讀書公父初補諸生尋襲衛職 本朝初以都司督上江漕
務愛賓遊重然諾生三子公長也次天騫天醇公自少穎異七歲
卽能詩稱神童明季流寇剽掠江淮間合肥被陷公隨兩大人蒼
黃被難手一卷不暫釋未及弱年誦四庫書殆徧始公家有別子
占衛籍永城故公卽以其籍登順治丁酉鄉薦明年成進士選翰

林庶吉士在館益博聞約說縱橫演迤於經史百家蓋經世之學
基此矣辛丑授檢討冬奉嫡母張夫人諱歸里服除補故官康熙
戊辰復以父憂去辛亥升司業迎養生母翟太夫人邸中尋升侍
講侍讀充日講起居注官歷講讀學士至少詹事丁巳升內閣學
士兼禮部侍郎在 上前有所見必陳無隱多見從辛酉升戶部
左侍郎部故利藪有以苞苴謁者公拒之曰吾一日在部汝曹無
望茲事之行也皆動色縮手相戒甲子調吏部尤以揚清激濁爲
已任公在戶部四年吏部五年而一無私焉 上自是器公益深
矣未幾升工部尙書轉刑兵二部尙書辛未遷長吏部曹司吏素
不便於公者畏公之復來而選人稔聞公名則喜甚公逐吏之尤

黠者以便選人而部復爲之一清云時當補大學士已逾年一日
上諭滿漢諸大臣曰機務重任必不可用喜事之人朕觀李天
馥老成清慎學行俱佳朕知其決不生事遂以命公時壬申十
月也次年六月翟太夫人薨上諭諸大臣李天馥入閣未久倚
毗方殷未及展施遽爾回籍深軫朕懷遂賜御書貞松二大字
兼賜以手卷云儒者當學探本原行迪醇茂循序進德守己中
虛一言一動罔有不謹嘉謀嘉猷必以入告斯廣譽翕聞爲周行
之士蓋緣公之所已能益屬望其加勉也行後一日上曰李天
馥侍朕三十餘年未嘗有過三年易過此官不必補人及服將除
卽召起公公感上知之深益退然若不自勝措其身於一言

一動無過之地如 聖明之詔誠而宰物應機要皆以虛公處之
長官百司各安其職一不以己與威福歸之於朝而毀譽不出諸
其口同列咸服其和敬而小大共樂其寬雅也 上三征朔漠還
兵革甫息公尤以甯民之道可也在簡欲變法不如守法欲救弊
未必無弊奉行故事惟謹不敢失尺寸此乃所以報也昔宋李文
靖公爲相真宗問治道何先對曰不用浮薄喜事之人此最爲先
文靖又嘗言居重位實無補惟中外所陳利害一切報罷之朝廷
防制纖悉備具或徇所陳請施行一事卽多所傷所謂庸人擾之
是已公之深慮遠識蓋絕類 上之器重公以此然文靖在位未
久公年亦不甚過之平格之老不壽於天痛矣夫公旣歿 上特

賜諡文定按諡法安民大慮曰定公之不喜事所以安民也人咸以受大名爲當云公性至孝先是張夫人之喪毀甚杖而後起及贈公歿亦如之有終身不逮養之悲而翟太夫人之喪歸當取道巢湖西口時冬月水涸及舟至水驟涌數尺如送喪者舟過卽落如故旣葬廬於墓側手植松楸晨昏禮謁淚血沾漬墓門忽有白燕雙飛掠水而至呢喃上下久之不去人咸以爲孝感遂名公所居爲白燕廬遠近皆歌而和之友愛二弟白首無間尤好爲德於鄉自廬墓後窮民歸之遂成村落當歲旱苗將槁公爲壇墓前三日齋以禱於天方蒲伏雨大作及秋忽飛蝗蔽天皆驚恐公復禱如前未幾蝗盡去鄉民咸德之公歿而哭之者眾久益不忘也公

在位尤篤於人物如李翰林因篤趙參政進美秦檢討松齡等公
爲學士時薦以應博學鴻儒科者也陸御史隴其邵參議嗣堯今
巡撫彭公鵬公爲吏部所汲引以洊至大官爲名臣者也下至單
門寒俊聞聲相思惟恐其不登用有名章迴句輒流連歎詠不置
蓋汲汲於以人事君其心好之誠而非有強也公所活人尤衆爲
學士時冬月斷囚嘗請生其死者知縣李方廣當死公曰其人素
有才名得緩不死尋以赦免又有殺人抵罪者公獨言乃仇人先
折其父足爲父報仇可赦也遂得減等兵興民多被俘贖而歸之
者嘗數百人在刑部有縣令負官錢數萬產盡應赦而吏持之急
公至卽與寬免以釋其子孫之係累者念囚多瘐死爲庀屋材多

爲之所別罪之輕重以居囚至今德之又有大獄下部議者皆曰
應死公察其冤獨議曰不當死 上竟從公議也始在翰林名藉
甚雅以文章爲己任諸號爲文家率後先倡和而尤與葉文敏公
及今尙書澤州陳公新城王公倡復古學刊落僞體每朝罷讌遊
或闔戶吟賞條然如林下人一篇出好事者爭傳諷既居相位雅
不以自多不復有狎主宗盟之豪氣而望其容貌習之於語默動
靜之間其風神局度使人意消皆書卷之所積而然也所傳有編
年詩容齋千首詩詩餘其古文制誥諸集將次第行世公生於有
明崇禎十年正月二十四日薨於康熙三十八年十月十五日年
六十五夫人李氏指揮同知諱兆生女繼張氏 贈封皆一品夫

人子二長編修孚青也康熙己未進士孚蒼己卯舉人女五適字
皆名族孫三昉琳貢生昉琳昉琴尙幼孚青等舉公之喪以某年
某月某日葬於某鄉某原茔事公於國子後數侍後堂之末不敢
以不文卻孤之請而公之事不勝書深懼槩而弗詳然弗敢誣且
溢又生平奉公之教甚多皆可書之大帶憶公貳吏部時茔以學
士與廷議遇事有不平者不禁形於辭色公微笑謂茔君何至是
凡事平其氣而可也僕初亦爾後漸熟漸平也茔退而尋味不已
而變化之爲難未嘗不有媿於公言銘曰

金斗六星其五主廬靈和篤公叶贊斗樞少也稽古經神學府洵
更常伯登爲碩輔薄伐既定簫鼓笙吹不吐不茹公相以詩官刑

政典有條秩如遵道遵路公相以書壯不如罔賁不如白何慮何
思公相以易運於無迹宰而不尸一龍一蛇一張一弛 帝深用
嘉長倚丞弼竭不憊遺三能圻一有煒玉管紀諸緇編載錫絲言
揭茲新阡稷契皋陶讀書不息畢如鬲如於斯長畢過者下馬痛
者回車鶴歸燕來占復其初

右墓誌銘韓英撰

湘北母喪歸廬墓側居常好施旣卒鄉人哭之如喪所親

右測海集張維屏錄

李容齋相國服闋入都其王戍諸門生已多通顯置酒新第讀學
史胄司卽席賦詩曰卽君館閣稱前輩弟子門牆半列卿

右漁洋詩話張維屏錄